

*Medicina*

*Grutini And: Medicus dog-*  
*maticus.*

*Cracov. And. Petre. 1598.*






4627


CIMELIA

XI. 6. 68









X1.



# M E D I C V S D O G M A T I C V S,

Ab

ANDREA GRVTINIO PILSNENSI,  
*Philosophia & Medicinæ Doctore & Pro-*  
*fessore, compendiosè pro tyroni-*  
*bus adumbratus.*



CRACOVIAE,  
In Officina Andreae Petricouij,  
Anno Dñi, 1598.

# IN MEDICVM

C. V. ANDRÆ GRUTINII  
CARMEN.

**Q**uisquis erit cupiens Medicum dignoscere verū,  
Atq; hominum pestes effugere ἀνδροφόνους;  
Grutiniū voluat pulchrum doctumq; libellum;  
Hic brevis ac elegans ista docere potest.  
Dum firmam rationem vsus comitatur, eodem  
Decipere haud vllum tunc medicina solet.  
At si præcipiti quisquam curans ruit vsu,  
Phæbus si fuerit decipit arte mala.

M. ERASMVS SIXTVS  
Leopolien.

BIBLIOTHE. UNIV.

Cim. Gu. 4627



JACOBUS



412  
ILLVSTRI ET  
MAGNIFICO DOMINO

D. LEONI SAPIEN. MAGNI DVCA-  
TVS LITVANIÆ SVPREMO CANCEL-  
lario, Slonimeñ, Rethouieñ, Bludneñ &c.  
Capitaneo. Dño colendissimo.

D. ANDREAS GRVTINIVS *Filsien.* S. P. D.

**D**iuinus Plato in Gorgia, Illustri  
& Magnifice Domine, ad vitam  
hominis in Repub. gubernandam,  
quatuor artes, quarum duæ ad a-  
nimam, duæ ad corpus pertinerent, necessarias es-  
se referebat. Ad animam pertinentium una est,  
qua leges conduntur: altera qua ea quæ condita  
sunt indicantur. Corpori verò deservientium,  
prior Gymnastice dicta, circa exercitationem  
corporis ad sanitatem tuendam versatur: posteri-  
or verò Medicina appellata, morbis curandis to-  
ta incumbit. Has quatuor, quòd certa ratione ad  
bonum perducerent, nomine artium dignabatur  
Plato; cæteras his oppositas, meras adulationes  
vocandas censebat. Gymnastice porrò nomine in-  
telligebat,



telligebat, non vulgarem illam & seruilem, qua  
 luctatores non ad bellum gerendum, hostemq;  
 stratagemate aggrediendum, verum propter pa-  
 lestras certaminaq; virium, utq; dicerentur pa-  
 lestrita, exercebantur: sed civilem, qualem He-  
 rophilus præceptor Hippocratis cum primum exer-  
 cuisset, post modum incidens (ut scribit Plato) in-  
 quendam morbum, videns se in posterum minùs  
 aptum illi exercenda fore: & se ad Medicos &  
 omnia Gymnastica præcepta, interim adhuc con-  
 fusa, ad artem Medicam traduxit: quaq; nobi-  
 les adolescentes bellis gerendis, hostibus arte fal-  
 lendis, idonei futuri exercebantur. ut ex eo per-  
 spicuum sit, artis Gymnasticæ functionem ad cor-  
 pora exercenda, non ad Medicinam pertinere.  
 Cum igitur in hac florenti Repub. ut ex eius re-  
 rum gerendarum progressu quisque aduertere  
 potest, priores tres artes fortasse vigeant: quar-  
 tam verò non minùs quàm reliquas, imò fortasse  
 magis necessariam (cum duæ priores animum, po-  
 steriorès verò corpus curent) in paucis admodum  
 cernamus. Eam obrem per otium, Syrio ardente,  
 non tam gloriæ, à qua semper alienus fui, quàm  
 publicæ utilitatis gratia, Commētariolū de Medi-  
 co ve-



911  
co vero, cupiens iunioribus qui se huic arti addi-  
xerunt, fontes ex quibus perfecti Medici haurirēt,  
summō digito demonstrare; ex Hippocrate &  
Galeno conscripsi. Hanc igitur qualemcunque  
lucubratiunculam meam, sub nomine Illustris  
Magnificentiæ V. quoniam eiusmodi Heroas, qui  
præter generis claritatem, natalium splendorem,  
virtutes magnas & admirandas, in literas & li-  
teratos, natura benigniores & clementiores sunt;  
qualem Illustrē Magni: V. omnes proficitur,  
cui natus est & peculiaris amor literarum &  
literatorum hominum; paucos admodum & ra-  
ros nunc habemus; in publicum prodire volui.  
Cuius enim auctoritate Serenissimus Rex singu-  
larem ipsius in magnis gerendis rebus dexterita-  
tem & felicitatem admiratus, in gravissimis lega-  
tionibus, magno consilio susceptis, singulari pru-  
dentia administratis, incredibili celeritate conse-  
ctis, summa diligentia constitutis, ceu quodam  
diuino, quem veteres artibus & scientiis præfece-  
rant, omniumq; legationum ad mortales & deos *authorē*  
finxerunt, Mercurio, cum laude & bono Rei-  
pub. utendum semper putavit: eius mihi patrocini-  
ij auspiciū in præsentī opusculo edendo qua-  
rendum



rendum existimari. Tum ut ingenuis adolescen-  
tibus commendatus hoc nomine euadat: tum ut  
contra maleuolorum contumelias nominis ipsius  
authoritate muniatur. Quare Illustri Heros,  
quo vultu soles istiusmodi reliqua, hoc meum  
hunc Medicum accipe, id est placido & beni-  
gno, meq; ipsum etiam in tuę protectionis placi-  
dissima umbra patere quiescere. Deus Opt:  
Max: Illustrem M. T. diu conseruet incolu-  
mem. Dat: Crac: Idibus Septembris. An-  
no Domini, 1598;



M E D I C V S  
D O G M A  
T I C V S.



EDICVM Dogmaticum & perfectum inuenire, eiusq; curandi absconditum & longissimum artificium describere; arduum & perdifficile opus esse vnusquisq; fortasse animaduertit. Cui etenim totum vitæ suæ curriculum ad vsum artis rectè assequendum non sufficit, is quomodo perfectus, & omnibus numeris absolutus Medicus dici, aut haberi, vel describi poterit? Verumtamen cùm Plato Rempub. qualis ipsa esse debeat, quamuis nulla talis Platonis Respub. fuit, nec vnquam inuenietur, in suis libris doceat: Galenus cùm hominis simpliciter & exquisitè sani idæam, quæ nunquam inuenitur, Medicumquæ optimum qui idem & Philosophus sit, luculenter exprimat. Cicero etiam cùm Oratoris perfectissimi officia & præcepta, qualis deberet fieri, non tamen inuentus est, artificiosè ostendat: quinimò Polycletus statuam hominis vnâ adeò pulchram, vt nullus homo vn-



homo vnquā inuentus sit qui possit ei in pulchritudine comparari, cū fecerit: profectò etiam non erit à proposito meo alienum, si speciem aliquam & formam Medici Dogmatici & perfecti, ex Hippocrate & Galeno, quàm breuissimè, sequutus Cosmographos, qui totius orbis ambitū angusta tabella contrahunt, adumbrare conabor. vt & ipse ad artis tam magnæ finem, notis constitutis, aliquando tandem peruenire; vel quoniam non omnibus hominibus licet adire Corinthum, si non ad supremum gradum habitus & vsus artis; saltem perfecti & veri Medici proposita idæa, ad illam quàm proximè accedere vel melior effici possim: aliisq; iunioribus, qui non quæstus, sed de hominibus bene merendi gratia, finem artis expetunt, & arti tam magnæ operam dare vehementius cupiunt, viam & iter commonstrare, & Medicum, ceu pictor penicillo, depingere valeā. Sicuti autem Apelles aliquam imaginem effingēs, non docebat pingendi artem; sed satis habebat vt in figura illa, ars sua optima & artificium insigne reluceat: ita quoq; in hac delineatione Medici mea, nemo methodum medēdi & artem expectet velim: quæ vno anno, Galeno teste, ab ingenioso disci possunt; exercitationem autem & vsum, ex quo finem artis & honorem, ij qui se magis circa hoc occupauerint & dederint, longa licet vita vix assequuntur. Quoniam ars longa, hoc est, v-

sus ab

p. de plac:  
Hip. & Plat.

tip: Aph.



sus ab illo habitu artis emanans, difficilissimus &  
 longissimus est, propter occasionem agendi præ-  
 cipitem; quæ adeò necessaria & cognitu difficilis  
 existit, ut etiam ab exercitatissimo vix percipi  
 possit; nihilq; in rebus agendis difficilius esse Ga- *1. ad Glauco.*  
 lenus dicebat, quàm occasionem inuenire: cum  
 in quodam temporis puncto indiuisibili consistat.  
 Huc accedit experimentum, ob subiecti nempe  
 corporis humani nobilitatem, quod omnium cor-  
 ruptibilium perfectissimum, mensuraque aliarum  
 specierum est, fallax, iudiciumq; difficile, Hippo-  
 crate docente. Quare difficile licet munus Me-  
 dici, sed tamen pulcherrimum est, ab eoq; subli-  
 mia ingenia deterreri non debent. nam si per me-  
 thodum & veram rationem ars hæc discatur, non  
 est tam longa ut opinantur aliqui: longa est his,  
 qui non cum artificio & methodo discunt & exer-  
 cent eam. Et quoniam communi nomine, & O-  
 cularij, & Auricularij, & Dentarii, cæteri q; alij, ob  
 commune propositum, Medici latius fuso voca-  
 bulo appellantur, cum sanitas apud omnes com-  
 munit intentio sit; modus autem non omnium  
 vnus, sed in numerum ingentem excrescit: à vul-  
 go etiam, qui nomina aliqua Medica nominant,  
 & secundum artem aliquid agunt, Medici existi-  
 mantur; quod non tam vitio vertendum quàm  
 consuetudini dandum est. Tamen ille demum o-  
 ptimus, perfectus, Hippocratisq; imitator, Me-  
 dicus nun-



dicus nuncupandus erit, qui artem & methodum curandi perfectè sciens, eam multo tempore in innumeris hominibus curandis cum ratione probet, & quàm diutissimè & accuratissimè exerceat, experimentisq; confirmet. Et quemadmodum scopus gubernatoris navis est servare navim, sed non est eius finis, nisi cum eam servat; ita sanitas est scopus Medici semper, sed non est eius finis, nisi cum potitur ea; peritus etiam nauclerus habetur, qui nunquam fecit naufragium: ille autem pro malo Medico habetur semper, sub cuius curatione multi perierunt. Ideò futurus Medicus meus is quem formandum suscepi; cum solum scopum hunc, vitam nempe ægri & sanitatem, nō autem ambitionem, honorem aut diuitias (adiiciuntur enim hæc) in primis sibi proponet: & cum ab vniuersalibus ad particularia procedere, artemq; præstantissimam exercere voluerit: opus erit (vt finem artis assequatur) eum ingeniosum esse, multumq; studiis incubere, & penitus ab omni cura & solitudine seiunctum, ab omnibus deniq; aliis impedimentis alienum, & omnia fortunæ bona (quoniam huius artis difficultas hoc exigit) contemnere; non enim simul possumus & pecuniam congerere, & arti tam magnæ operam dare: sed qui alteram vehementius appetat, alteram contemnat necesse est, dicebat Gal: neq; poterit esse optimus Medicus, nisi is sit & bonus Gram-

maticus,

In suo Me-  
dico.



maticus, bonus Logicus, Rhetor, Mathematicus,  
 Physicus Moralis & Methaphysicus: & vt vno  
 verbo comprehendam, nisi sit in omnibus prudēs  
 & optimus vir spectatæq; probitatis. Artem ergo  
 emendatè loquendi, ex lectione veterum optimo-  
 rum & elegantissimorum authorum, qui sermo-  
 nis elegantia præcelluerunt, in eum finem, vt fun-  
 damentis solidè iactis, ædificium Philosophiæ &  
 Medicinæ superstruat, consequetur; non vt in eo  
 studio consenescat, & per omnes omnium scri-  
 ptorum libros circumagatur: sed vt degustet o-  
 ptimos, & reliqua suppeditet præceptor: ne de  
 ipso dicatur, quod tempore Galeni de nonnullis  
 Medicis dictum fuit; qui tantam Grammaticæ,  
 Dialecticæ & Rhetoricæ cognitionem habebant,  
 quantam asinus lyra: quamuis & nunc reperias  
 aliquos in vno verbo bis peccantes. Huc addet  
 & Historiam (quæ sine Cosmographia & Ar-  
 thmetica cæca est) & antiquitatis cognitionem,  
 adhæc trium linguarum peritiam vel etiam pluri-  
 um, quamuis διγλωττες duas callens linguas, olim  
 miraculi instar fuit. Sciat tamen tres linguas, vt  
 veterum libros rectiùs intelligat & iudicet. Dia-  
 lectica quoq; cæca est absq; Grammatica, quic-  
 quid enim agit Dialectica, per sermonem agit, per  
 hunc enunciat, deffinit, diuidit & colligit; quare  
 hoc instrumentum Dogmaticorum Medicorum  
 sibi comparabit, si Dogmaticus non Empiricus



2. Therap.  
cap. 6.

haberi voluerit, qui ab vno particulari ad aliud  
particulare procedunt, exemplo & signis vtuntur,  
Epilogismumq; conficiunt. Dogmatici autem A-  
nalogismo ab vniuersali ad particulare, & è con-  
trà procedendo, in prima secundaué figura con-  
cludendo, vtuntur. qua in re multum elaborabit,  
illam Galeni sententiam timens: Satius est bo-  
num Empiricum esse, quàm malum Dogmaticum  
& expertem demonstrationum. Rhetoricæ autem  
quæ huic cognata est, tantum dabit operæ, quan-  
tum poterit ex eius vsu sibi dicendi facultatem  
parare, educabiturq; à præceptore, non scholæ  
Rhetorum, sed Medicinæ; non enim destinatus  
est agendis causis forensibus & obeundis princi-  
pum legationibus, sed sanitati conseruandæ & re-  
staurandæ: vtque quomodo conseruetur & re-  
cuperetur, appositè causas modumq; agendi edif-  
ferat; ne illud Aristotelis ab aliquo Philosopho  
cum probro audiat: Nolo me tanquam fossorem  
aut bubulcum cures, ediffere causas, &c. Omni-  
no opus est, vt mœstos ægrotantes soletur, timen-  
tes animet, iratos placet, furentes còerceat, ani-  
miq; omnes perturbationes sedare possit, ex qui-  
bus constat humores & spiritus conturbari, cor-  
pus alterari & vires deiici. Ideò & Moralis Phi-  
losophiæ gnarum oportet eum esse, vt motus &  
alterationes in hominum animis sciat; qui ad a-  
gendum, quiuè ad patiendum apti sunt animi, ob  
hoc qua-



hoc quale corpus ægrum sanitatem suscipere aptum est, quale non. Veluti etiam optimus Orator varios animorum affectus cognoscens, iuxta vniuscuiusq; temperaturam, variè circa persuasione & dissuasione animorum versatur. aliter enim Regis animus ad motum se habet, aliter verò subditi & pauperis: alius pueri, alius adulti, mulieris alius animus: quæ omnia animi accidentia, exactè scire Oratorem oportet, si persuadendi tramitem reperire voluerit. Porro Mathematicas disciplinas facillimas, quæ etiam à pueris disci possunt, facile Medicus percurreret; necessaria & facilia illarum artium degustans, situm ac motum orbium cælestium ad plurima necessarium non ignorans. Neq; Lunæ radiationes in exhibendis medicamentis tantoperè, ut vulgus facit, evitans; Nam cum ducere volueris elleborum, moue corpus, dicebat Hipp. cum verò Luna cum Sole coniungitur & radiationem init, mutantur tempora manifestè, quia elementa & humores agitantur. Bonum ergo est tunc Medicinam exhibere in coniunctione corpori repleto, in quadrato & post oppositionem purgantur melius, optimè autem purgantur vel minuuntur hora radiationis cum Sole, vel cum Luna Ioui vel Veneri sociatur, teste Galeno. Congressum autem Lunæ cum Saturno vel Marte & alia cauebit; æremq; aquas & loca varia & diuersa considerans.

3. de diebus  
decretorius.



Diuinatricem autem Astrologiam, & Genethliacorum curiositatem, penitus negliget. Astrologi enim semel obseruato sydere, legem statuunt: cum quæ à coelo capiuntur causæ nondum satis sunt cognitæ; sed coniectura quadam capiuntur, quam inuexit semel oblatus euentus. Huic ergo curiositati, ne tota hominis ætas sufficere posset: ideò illorum commentis minimè credendum & insudandum Medico erit. Geometriam nihilominus perspectiuam cæterasq; bonas disciplinas tenebit, non tamen in his porticibus & studiis diu desidebit. Multumq; vt quorundam desidia consulamus, compendij ad adipiscendas disciplinas adferet, si ex optimis præcipua commodissimè delibet, superstitiosa resacet & reiciat, omniumq; artium *εγκυκλοπαιδειαν* absoluat: septemq; illas conditiones Medico necessarias, à Galeno positas, ante oculos habebit: acre ingenium, educationem à puerili ætate atq; exercitationem, aures omnibus qui optimi sua tempestate esse iudicantur accommodatas habere, nullis laboribus parcere, vt præter disciplinas, aliud nihil die noctuq; meditetur, veritatis amantissimum esse, methodum perdiscere, qua verū & falsum discernitur: præter hæc autem omnia Methodum exercere. Naturaliū porrò cognitionē ita tractabit, ne parte Medicinæ præcipua destitutus, ex qua Physicus appellatur, esse videretur. Vbi enim desinit Physicus, ibi incipit

Ac const: Arist.  
 tis cap: 7.

incipit elegans Medicus, dicebat Aristoteles. *Lib. de sensu  
& sensibilibus*  
 Multum ergo in ea proficiet & opera pōnet; non  
 tamen per vniuersam ætatem, de materia prima;  
 de principiis, de infinito, de mundi generatione  
 disputabit: sint etiam quàm ingeniosa, subtilia;  
 quæ Scotus tradit: sed hæc ad Medicum nihil.  
 Magiam autem & Cabalisticam & Alchimiam pe-  
 nitus contemnet & deridebit. Chimista enim, vt  
 illos prætermittam & ex vno cognoscantur reli-  
 qui, quærit calore benigno conficere aurum om-  
 ni artificio, & cognoscit materiam metallorum:  
 tamen non potest assequi vt faciat aurum; facit  
 quidem auro aliquod simile, est tamen infinita  
 differentia, quia natura sola mixtionem veram fa-  
 cit, quia natura est intra rem quam facit, penetrat  
 in singulis, & ideò ad finem omnia deducit: Al-  
 chimista autem vt artifex est extra; ideò solum  
 extra delineat, vt pictor & sculptor: natura habet  
 instrumenta idonea, calorem agentem non igneum,  
 sed correspondentem calori stellarum: habet par-  
 tes verè simplices, ideò attingit finem; & quæcū-  
 que commiscet, omnia sunt perfecta. Vanum est  
 ergo & ridiculum, inter fumum & carbones de-  
 sudare, & magnum dispendium & temporis quod  
 esset in meliores vsus distribuendum, & rei qua  
 familiam & egentes alere deberent, in hac vani-  
 tate collocare & perdere. Mirum tamen est huic  
 studio & distillationi, quæ non tantopere rei Me-  
 dica est



qu:  
dicæ est necessaria, frequentissimè autem imò  
semper periculosa & damnosa, tam prophanos  
quàm sacrificos, eosq; primarios viros, dare ope-  
ram: decoctiones enim plantarum esse efficaci-  
ores aquis distillatis & sumptuosis, manifestū est.  
Olea autem sua Dioscorides, ad solem diebus  
Caniculæ parabat, non ignis vi Empireuma illis  
inducebat, licet aliqua ad ignem fermentabat.  
Memini me lusisse potius quàm scripsisse quædā  
in eam artem, vt serio homines ab hoc inani &  
vano studio reuocare, aliosq; ne attentarent, mo-  
nere & præcauere possim. Trahat tamen quemq;  
sua voluptas. Cæterum Dogmaticus & Phycus  
meus, potius in simplicium cognitione & Anato-  
mica exercitatione, multum temporis insumet, &  
materiam hanc medicam, non ad mulierculas im-  
peritas aut seplasiarios relegabit. Si enim plan-  
tarum, in quibus non tam manifestæ sunt opera-  
tiones, in mineralibus autem occultissimæ, natu-  
ram ignorauerit: quomodo medicamentorum  
compositionem scire poterit? quomodo non sæ-  
pe sine suo frustrabitur, medicinæq; calumnia in-  
feretur? sed frequenter eas ipse inspiciet, & à Do-  
ctore, ortum, interitum, integram ætatem & de-  
crementum, effectusq; & causas earum atq; diffe-  
rentias, gradus, conuenientiam formarum & oc-  
cultas causas diligenter inquires & considerabit.  
Et quod faciet ad memoriam, methodo certa in  
his &

his & in omnibus aliis, gustuq; certiore ceteris  
 sensibus hoc in studio utetur. quoniam simul &  
 tactiles & gustabiles qualitates is sensus percipit;  
 medicinæq; omnes omniaq; mixta in potentia,  
 corpus autem animalium in actu calorem habent.  
 Ideò ex sapore, vires tam primas quàm secundas,  
 tertias & quartas, medicamentorum omnium co-  
 gnoscet, & Dioscoridem atq; Galenum perleget.  
 qui quidem Dioscorides ad quingentas plantas  
 summa diligentia descripsit, vires autem non om-  
 nium expressit: quarum plantarum vires si co-  
 gnoscerentur, magicæ profectò esse existimaren-  
 tur. Quæ verò ab animalibus & mineralibus su-  
 muntur, eas non negliget; licèt mineralium infi-  
 nitæ propè sunt proprietates & operationes pro-  
 pter diuersitatem mixtionis in iisdem. Anatomix  
 autem, quæ est alphabetum Medicinæ, vt potè  
 quæ sola loca malè affecta valet indicare, non so-  
 lum sectioni astabit, verumetiam propriis mani-  
 bus sectiones obibit, & illas perinde ac simplicia  
 medicamēta sedulò frequenterq; versabit. Artem  
 enim hanc secandi corpora edoctus Galenus, illū  
 (nota historia est) qui è vehiculo Romam profi-  
 ciscens deciderat & trium digitorum manus sen-  
 sum amiserat: cum summa Medicorum admirati-  
 one, eundem & infinitos alios breui sanauit. A-  
 natomiæ autem imperiti, & præsertim ij qui eam  
 crebrò in simiis & hominum corporibus non su-

1. de loc: affe:  
 cap: 5,



Gal: de cōp:  
me: per ges  
nera lib: 3.  
cap: 4.

erint intuiti, sed fortuita sola & speculatione vul-  
neraria contenti, in nervis curandis; similes iis  
sunt qui iter in lectica cœci faciunt, vehemēterq;  
errant; putredinem, claudicationem, conuulsio-  
nem, & ipsam mortem ægris inferentes. Addiscat  
ergo meus Medicus simiæ & humani corporis  
concisionem, musculisq; dissecandis manum ad-  
moueat, principium & extremum illorum, fibras-  
que omnes videat, hoc enim tum Medicinæ par-  
ti quæ manu medetur (*χειρουργίαν* Græci vocant)  
tum actionibus inueniendis, haud parum illi  
profuerit, & vulgaribus Chyrurgis admiratio-  
ni erit. In qua parte seu instrumento artis, &  
in omnibus aliis, Galenum ipsum, & ex recen-  
tioribus Andream Vesalium & Ioannem Tagaul-  
tium, aliosque videbit, ipsique Galeno adhæ-  
rebit; quem si intelliget, omnes intelliget, v-  
nusq; Galenus pro innumeris authoribus illi suf-  
fecerit. Præcipuè tamen in Galeno si festinabit,  
isti libri legendi erunt, libri de Elementis, libri de  
Temperamentis non oscitanter legendi, de Na-  
turalibus facultatibus, de locis affectis, libri A-  
nathomici, libri sex de differentiis & causis mor-  
borum & Symptomatum, aurei quidem & ad vn-  
guem addiscendi, libri de sanitate tuenda, libri  
de simplici medicina, & tandem Theraupertica,  
& isti libri Organici Medicum & optimi præce-  
ptores instruent, ad rectè opera Medica exercen-  
da. Post

da. Post hæc autem ad Hippocratem accedet, eiusq; Aphorismos omnes, tanquam digitos suos tenebit, in quibus libris ars veluti in pugillo continetur, & vno intuitu habetur: ad hos tamen & alios libros, neminem accedere debere vetat Galenus, nisi prius totam Medicinæ facultatem viderit. nemoq; Hippocratem legat, nisi omnes meos antea libros legerit; quoniam Hippocrates artis tantummodo semina tradidit, ego autem, inquit Galenus, artem totam perfecit. Summa ergo prudentia, diligentia, multarum rerū cognitio, omniū scriptorum Galeni & Hippocratis lectio, à Medico optimo futuro exigitur: quāvis ex tribus partibus librorū Galeni vix vnam partem, & Hippocratis non adeò multos habemus, libros de Natura humana, de Regimine victus a-  
cutorum, de locis, àère & aqua, de Humoribus, libros Prognosticorum (libri Prorhetici falsò attribuentur) Epidemicos, Aphoristicos & alios. liber tamen de alimentis, nec secundus Epidemiorum, nec secundus de natura humana, nec liber de carnibus Hippocratis genuinus est, scripsit etiam librum ἐξήκοντα vocatum, vbi totam etiam Medendi artem complexus est, sed interuallo temporis periit: quæ omnia percurrere, vt difficillimum ita pulcherrimum & admodum necessarium illi est. Maximè autem sic imbutus, & sic ab optimis quibusque præceptoribus instructus,

4. Aphor: 71.

6. Methodi  
cap: 4.



exercitationi artificiosæ se tradet, experimentisq;  
 artem comprobare maturè assuescet: quatuor  
 præ oculis semper habens. Primò, vt ea intentio-  
 ne, eo animo accedat ad patientem vocatus, vt  
 morbū remoueat, adultera artis negligat; non ac-  
 cedat vt lucretur, sed vt sanet ægrotum, & quærat  
 quæ citò, tutò & iucundè id præstare possunt. Se-  
 cundò speculandum illi erit circa ægrum, vt co-  
 gnoscat morbum & morbi naturam. Tertiò, an-  
 tequam aggrediatur curam, præmittet prognosti-  
 ca & præuidebit futura, quo seruabit honorem  
 proprium Medici. Vltimò ad curationem mor-  
 bi se accinget, indicationes eriget, & remedia  
 parabit. Fontes digito monstro, ideo, ne miretur  
 si tantum capita attingo, fusiùs tamen & luculenti-  
 ùs hoc in quo cardo rei est explico. Vniuscuiusq;  
 morbi cognitionem in quatuor consistere sciet,  
 in essentia seu natura morbi, motu morbi, tempo-  
 re & moribus morbi. Et si cognoscenda est essen-  
 tia morbi, priùs cognoscendæ causæ ipsius, tam  
 intrinsecæ quàm extrinsecæ sunt, quæ constituunt  
 morbum. Ratioq; formalis à Medico primò con-  
 sideranda, non solum in genere, sed etiam in par-  
 ticulari & specie specialissima & indiuidua, ultra  
 quam non licet progredi; veluti quando conside-  
 rat aliquam febrem, primò formam cōtemplatur  
 in genere vniuersali, & videt quòd ista febris est  
 quædam qualitas eius, quæ est dispositio; sed quia  
 ista di-

ista dispositio præter naturam latet, calor verò  
 igneus, proxima causa febris, statim percipitur.  
 ideò Medici definiunt: Febris est calor naturalis  
 mutatus ad igneum, accensus in corde. sed istud  
 non sufficit in genere scire, oportet deuenire ad  
 speciem specialissimam & differentiam formale  
 huius febris, cuius essentiam inuestigamus, & tum  
 cognoscimus, quando illa forma vniuersalis in  
 praxi applicatur formæ particulari: vt forma eti-  
 am Epilepsiæ est contractio, quæ contingit in ip-  
 sa. Sic forma febris Tertianæ, calor mordax &  
 paroxysmus inuadens cum frigore: & hæc vel est  
 exquisita, vel notha. sic Epilepsia, vel per se, vel  
 per consensum, in hoc vel in illo indiuiduo; & ita  
 consideranda forma morbi, qua cognita materi-  
 am considerabit: illud non ignorans, quòd mor-  
 bus non intelligitur componi ex materia & for-  
 ma, vt homo componitur ex anima & corpore, vt  
 partibus essentialibus & substantialibus, ita vt ha-  
 beat formam & actum substantialem coniunctum  
 materiæ; sed appellatione materiæ intelliget cau-  
 sam, vt humorem à quo immediatè pendeat æ-  
 gritudo, & cui inhæreat forma huius ægritudinis,  
 vt in suffusione oculorum dicimus obstructionem  
 esse formalem rationem, materiam verò dicimus  
 esse illam aquam, quæ intercidit inter pupillam  
 & tunicam corneam, oppilantem spacium inter-  
 medium; illa non est vera forma, hæc non est ve-



ra materia: sunt causæ à quibus dependet læsio vi-  
 sionis: & quia est humor aqueus corpulentus, di-  
 citur materia morbi, à qua dependet immediatè  
 oppilatio illius spatij. Eodem modo in febre pu-  
 trida, quando dicitur quòd humor putridus est  
 sua materia, non intelligimus veram materiam ex  
 qua componatur, neq; calorem ita esse formam  
 vt det actum materiæ & faciat vnum per se, sed  
 est proxima causa dispositionis, quæ vocatur fe-  
 bris; & hæc non est forma, sed accidens, & quali-  
 tas de prima specie, quæ inhæret huic materiæ.  
 Materiam ergo vt formam morbi debet etiam in  
 genere & specie Medicus, si rectè curare volue-  
 rit, considerare: quæ duplex est. Proxima seu cō-  
 iuncta, & immediata materialisq; causa morbi:  
 qua posita, ponitur actu morbus, & remota re-  
 mouetur; veluti aqua illa decidens inter corneam  
 & pupillam, est causa materialis proxima & con-  
 iuncta suffusionis, & putridus aliquis humor siue  
 pituitosus biliosus siue aliquis alius, dicitur cau-  
 sa materialis, eo quòd proximè causa est morbi,  
 & coniuncta cum forma morbi. Est & altera ma-  
 teria improprie dicta, largo modo accipiendo  
 nomen materiæ, pro eo cui inhæret, tanquam for-  
 ma & accidens in suo subiecto receptum vt sub-  
 sistat. Non posset enim esse morbus, nisi esset sub-  
 iectum in quo subsisteret, & hoc est corpus hu-  
 manum, in quo sunt diuersa subiecta: quemadmo-  
 dum he-

dum hectica febris est in cordis substantia, & in  
 membris solidis, tanquam in subiecto: quæ febris  
 est sine materia primo modo dicta, non habet a-  
 liquam causam materiale vel coniunctam, sed  
 est simplex, nempe calida & sicca intemperies, in  
 membris solidis confirmata: quam febrem nun-  
 quam poterit remouere, nisi prius cognoscat sub-  
 stantiam ipsorum membrorum, in qua ut proprio  
 inest subiecto. & cognita materia, hoc est sub-  
 stantia ipsorum membrorum, alterabit seu altera-  
 tibus remouebit intemperiem simplicem: non est  
 enim intentio aliqua ad humorem, cum non pen-  
 deat ab humore: & si morbus careat materia &  
 humore à quo dependeat, tamen habet subiectū  
 in quo subsistit. In quacunq; ergo ægritudine, &  
 causā coniuncta, & corpus humanum vniuersali-  
 ter in quo est morbus, & num in corde, num in  
 aliis membris, num in toto, contemplandum est.  
 Postea ad cognitionem essentiæ morbi, causæ ex-  
 trinsecæ quæ sunt agens & finalis, considerandæ  
 sunt. Sed omissa finali, quam Medici nihili faci-  
 unt, (in morbis enim quos natura non intendit, fi-  
 nis consideratio nulla, morbi sunt errores & de-  
 fectus naturæ) potius ergo vertet se ad contem-  
 plandas efficientes, quæ præcipuè sunt in tracta-  
 tionibus Medicorum, quarum quædam procata-  
 cticæ, id est primitiua, extrinsecæ sunt omnino &  
 extra corpus humanum, ut aer ambiens exterius  
 totum



totum corpus, & per anhelitum ad cor exceptus, cibis & potus pro nutritione, animi accidentia siue perturbationes, quæ quotidie in rebus agibilibus contingunt, variè & diuersis modis, & reliquæ omnes sex causæ quæ dicuntur à Medicis res non naturales; istæ exterius existentes, occurrunt necessariò corpori humano, & alterant, alterando immutant, & varios inducunt morbos. Sunt aliæ quædam causæ proigumenæ seu antecedentes appellatæ, efficietes, extrinsecæ & ipsæ, sed intra corpus humanum, quæ efficiunt morbos alterando. Et istæ sunt humores in corpore existentes, qui non actu faciunt morbum, quoniam essent causa coniuncta, de qua superius dictum fuit, sed apti sunt vt ipsum efficiant, & leui quacunque de causa & occasione moueantur & faciant morbum: aliquando accidit, vt colligantur humores intra corpus, qui aliquid etiam leue passi efficiunt ægritudinem, & actu iam morbum faciunt. Istas ergo efficietes, non quòd actu morbum efficiant, sed quia possunt efficere, propter præseruandum considerabit. Secundò, naturam morbi penes motû ipsius videbit. Non enim eodem modo omnes mouentur ad declinationem & ad terminum suum: quidam sunt velocissimi motus, vt cum primùm inceperint, statim videntur deficere & terminari: quidam tardè mouentur. Illi qui citò & velociter mouentur, à

Græcis di-

Græcis dicitur ὀλιγόχρονος, quasi dicas pauci temporis & citi motus. Qui verò tardè, χρόνιοι, quasi dicas multi temporis & longi motus appellantur. Sciendum ergo est, quando terminaturus sit, an citò, an tardè, nunquid sit ὀλιγόχρονος, an verò chronicus: quoniam secundum tarditatem & breuitatem morbi, habemus occasionem ad dirigendam victus rationem & ad exhibendas medicinas. Occasio enim præcepta est, vt ait Hipp. speculari oportet occasionem, ne transeat inconsideratè, vt nihil postea agere possimus. Aliam rationem victus instituimus in his qui citò terminantur, aliam in his qui tardè: in acutis statim in principio occasio ad operandum est, vel pharmacum exhibendo, vel sanguinem mittendo: in chronicis autem sensim procedimus. Tertiò obseruanda sunt tempora, quia in diuersis temporibus morborum diuerso modo procedimus in curatione: aliud agimus quando morbus est in principio, aliud quando in augmento, aliud in statu, aliud in declinatione. Tempora morbi attenduntur & distinguuntur penes coctionem & cruditatem, & apparent signa coctionis, quæ indicant pugnam naturæ cum morbo, vt benè demonstrabat Galenus initio de Crisibus. Itaq; si vult considerare tempora morborum, & habere earum distinctionem; cruditatem & coctionem inspiciet. Quartò & vltimò oportet videre mores ipsius morbi, Mores intelligo penes Symptomata seu acciden-



tia : num sint mitia & benigna , an verò fœua &  
 timenda ? quandoquidem si benigna & mitia fu-  
 erint accidentia, morbus etiam indicatur esse be-  
 nignus non lethalis, & sic dicuntur morbi bono-  
 rum morum & bonæ naturæ. Contrà sunt aliqui  
 morbi cum accidentibus fœuis, malignis & dete-  
 stabilibus, qui propriè à Græcis dicuntur κακόνους,  
 malæ naturæ & malorum morum, quoniam ha-  
 bent malitiam, & sunt cum periculo vitæ, ne ad  
 mortem terminentur. Tantò ergo diligentius mo-  
 res morbi considerandi, quantò magis faciunt  
 ad curationem tum ad prognosticum, sed magis  
 ad prognosticum: vt in acutis, quando ægritudi-  
 nes citò mouentur, & habent deterrima Sympto-  
 mata, prædicemus futuram mortem. Si verò be-  
 nigni sunt morbi cum benignis accidentibus, sa-  
 lubrem dicemus. Ad curationem autem confert  
 hoc scire. quoniam cum ægritudinem sciemus sa-  
 lubrem vel insalubrem, sciemus quoq; quomodo  
 nobis erit procedendum, & nunquid operandū,  
 vel non ? Quando itaq; considerabit veniens ad  
 ægrotum ista quatuor: essentiam morbi penes  
 causas: & intrinsecas materiam & formam: & ex-  
 trinsecas efficientes: tempora morbi, in quo tem-  
 pore sit, quando erit vocatus, num in principio  
 vel augmento, &c. motum, an citi motus, acuti  
 vel tardi chronici: & mores, vtrum ægritudo mo-  
 res benignos habeat an malignos ? tunc verè co-  
 gnoscet naturam morbi, in qua consistit tota cu-  
 rationis

rationis ratio. Natura ægritudinis est illa, quæ per indicationes proprias dirigit Medicum in curatione. sed quia hæc quatuor non semper manifesta sunt & nota, latent & sunt occulta: oportet ergo à posteriori per effectus deuenire in cognitionem ipforum. Ergo indicia sunt à nobis inquirenda: indicia & signa haberi non possunt, nisi locos constituamus, à quibus vniuersaliter vt fundamentis & fontibus signa eliciantur. Hi fontes sunt in duplici differentia: primò alij sunt intrinseci: alij verò extrinseci, à quibus non sumuntur vera signa morbum statim indicantia. Intrinseci sunt actiones læsæ, quæ immediatè à morbo dependent. Fontes intrinseci signorum morbum significantium sunt quinque numero, ex sententia Gal: Primus est actio læsa, quæ cum primò & per se morbum significat, quamuis ostendat etiam locum affectum secundariò. Secundus fons, sunt exeuntia extra corpus humanum præter naturam & mutata, vt sunt vrinæ præter naturam, recrementa alui, sudores, & similia corporis excreta: quæ enim excernuntur à corpore, vel sunt naturalia, vel præter naturam: non naturalia à quibus sumuntur indicia morbi, quia præter naturam sunt, dicuntur exeuntia mutata. Tertius fons est, dolor qui apparet in aliqua parte corporis: vbi est, indicat morbum: vbi dolor, ibi ægritudo, dicunt Medici. & non modò dolor indicat locum affectum, verum etiam morbi magnitudinē:

2. de locis affectis cap. 9.  
& alijs locis.



si magnus dolor, magnus est morbus, si parvus,  
 parvus: ex differentiis doloris cognoscet etiam  
 varias materias morborum. Quartus, cùm fue-  
 rint tumores in aliqua parte corporis, indicant  
 esse ægritudinem in ea parte: vbi est tumor, ibi  
 est ægritudo. Quintus & vltimus, sunt quædam  
 accidentia propria, quæ consequuntur morbum,  
 sicut vmbra sequitur corpus, tussis consequitur  
 ægritudinem existentē in membris spiritualibus,  
 vbi materia in thorace fuerit collecta, stimulat  
 virtutē & insequitur tussis. Tussis enim nihil aliud  
 est, quàm motus vehementissimus partium spiri-  
 tualium, institutus & factus à natura, vt expellat  
 nocumentum in illis existens: vbi igitur tussis est,  
 ibi ægritudo est in thorace & partibus spirituali-  
 bus. Ille est vltimus fons signorum, accidentia  
 propria consequentia morbum, non exeuntia;  
 non actiones læsæ. Ista accidentia vel sunt per-  
 petuò consequentia & subsequētia, vel sunt præ-  
 cedentia, de quibus non est locus hîc vt tracte-  
 mus. Contemplabitur ergo Medicus circa ægrū  
 contingentia ista, vt per signa omnia collecta de-  
 ueniat ad cognitionem morbi: quæ signa haberi  
 poterunt, partim ex præsentibus accidentibus,  
 quæ apparent, & ex relatione astantium amico-  
 rum: partim ex his quæ quotidie & singulis die-  
 bus emergunt, quando visitat ægrum. Sed ad ter-  
 tium propositum, nempe prognosticum, venia-  
 mus: in qua arte prognosticandi omnino opor-  
 tet cum

tet eum esse exercitatum, si inter maximos Medicos haberi vult: prognostico enim distinguuntur Medici docti ab indoctis: in hoc toto cognoscitur vera doctrina & artificium Medici, non in remediis applicandis. Periti & imperiti eodem Oxymelite, iisdem Syrupis vtuntur, eadem sunt vtrorumq; Medicinæ: ita periti curant sicut imperiti, & ita his feliciter succedunt auxilia sicut & illis: imò fortuna potius fauet temerariis & ignaris, quàm sapientibus. Propterea in curatione dirigenda, siue fiat rationabiliter, siue casu & fortuna, non distinguetur Medicus doctus ab imperito: in solo prognostico verè cognoscitur, non in euentu rei. Libris ergo Prognosticorum Hippocratis studendum est: tum vt ægroti Medico prædicenti magis fidant atq; obsequantur: tum vt Medicus præcognoscens morbos futuros, faciliùs ipsis obuiam ire possit: deniq; Medicus ægrotum moriturum prædicens, se vindicet ab infamia. Sed benè vellem illud homines sciant, Medicum esse rationalem non vatem; ideò quando prædicit futuram mortem, in tali vel tali hora vel die; non prædicit vt vates & Propheta, sed vt Physicus & Medicus rationalis, qui non sine ratione mouetur. Primò respicit accidentia omnia, ex quibus discurrendo per eorum causas, colligit mortem vel salutem. Si mortem, alia deinde considerat, ex quibus & diem & horam mortis prognosticatur. Sed illis fundamentis tribus habitis,



ultimò tandem curationem in morbis curabili-  
 bus, indicationibus erectis aggredietur. Indica-  
 tio autem communis & vulgaris sumenda est à  
 morbo, & non potest sumi, nisi natura ipsius co-  
 gnoscatur: vt v. g. Est morbus, ergo remotio  
 eius indicatur. Vnusquisq; hoc scit, vltèriùs pro-  
 grediendum est. Si debet remoueri, oportet vide-  
 re causas, & remouere tam intrinsecas quàm ex-  
 trinsecas ipsius morbi. Morborum autem alii  
 nondum sunt facti, sed nisi prouideatur, futuri.  
 Alii fiunt, & partim sunt facti, partim fiunt. Alii  
 omnino sunt facti, nec ampliùs fiunt. Et hinc o-  
 riuntur indicationes, vel præseruatiuæ, vel cura-  
 tiuæ, vel mixtæ. Duæ simplices extremæ, præ-  
 seruatiua à morbo non ente, curatiua à morbo fa-  
 cto. Composita vna & mista, à morbo qui par-  
 tim fit, partim factus est: non est factus nec abest,  
 sed est in fieri, vt dicunt Medici. Quatenus fit, in-  
 dicat præseruationem, quòd remouendæ sint cau-  
 sæ efficientes extrinsecæ: & præseruatiua indica-  
 tio est, vt prouideat Medicus ne vltèriùs ægritu-  
 do progrediatur. Quatenus factus est, indicat re-  
 mouendum esse & curandum, & hæc est indicatio  
 curatiua, quæ indicat remouendas causas intrin-  
 secas morbi essentielles, actu facientes ipsum. A  
 morbo ergo distincto, distincta sumitur indicatio,  
 & artificialis non vulgaris. Exemplo propter iu-  
 niores illustro. Febris putrida maligna non po-  
 test remoueri, nisi remotis causis febris. Causæ  
 sunt quæ-

sunt quædam materiales à quibus dependet, nempe tres humores, qui sunt remouendi; primò quidem sunt vapores putridi, eleuati ab humoribus putridis intra venas, qui petentes cor, non modò calefaciunt humores cordis, quibus commiscuntur; sed quod magis est, quia pestilentes, putrefaciunt & putredine summa inficiunt. Et cùm hæc sit materia proxima coniuncta huius febris, Medicus debet remouere vapores putridos & humores putrefactos in corde: ideò cõstituitur vna indicatio curatiua, vt remoueatur materialis causa. Non poterit enim Medicus remouere illos vapores, nec humores putridos, nisi priùs remoueat humores qui actu putrescunt in venis totius corporis, à quibus eleuantur vapores putridi, qui sunt causa proxima & immediata febris pestilentis. Duplex itaq; erit hæc indicatio. Vna simplex, quæ est vt tollantur vapores putridi & humores corrupti, & ista respicit immediatè causam coniunctam. Secunda est mixta ex curatione & præseruatione, cùm illa prima sit simplex curatio, sed quia non potest tolli causa efficiens, non possunt tolli humores corrupti, & à venis educi, nisi euacuem primò & remoueam humorem, qui nondum putruit; illud videlicet quod reliquum est de massa sanguinis minimè putrefactum, & est causa antecedens simpliciter. & ita indicatio erit ab humore non putrido præseruandi simplex. præseruabo namq; ne putredo fiat in hoc humore, euacuabo humorem, qui

1.  
Indicatio

2.

3.



rem, qui nondum putruit, ne putrescat & augeat  
 causam efficientem, consequenter & coniunctam.  
 Et sic quod erat vltimum in resolutione, erit pri-  
 mum in executione, ascendendo ab euacuatione  
 causæ antecedentis, ad euacuationem causæ effi-  
 cientis, postremò ad tollendam causam coniun-  
 ctam. Duobus autem instrumentis veram & per  
 se euacuationem Medicus perficiet: vel pharma-  
 co soluente, vel sanguinis missione: & vtrum ho-  
 rum an vtrumq; conueniat, prius illi videndum e-  
 rit. Non sufficit enim vniuersales indicationes  
 scire, necessariò spectandæ sunt magis artificiosæ  
 & particulares indicationes. Non solum enim sa-  
 tis est scire quod est euacuandum, sed etiam qui  
 humores sunt euacuandi, qui non. Deinde scien-  
 dum est, quantum, qui termini sint euacuationi:  
 tandem etiam quomodo euacuandum, quando,  
 per quæ loca commoda. Nam inquit Hip: per  
 cōuenientes regiones ducere oportet. Quæ con-  
 ditiones quinq; non solum in arte Medica, sed e-  
 tiam in quacunq; actione prudenti & rationabili  
 obseruantur. Tum limitantia seu contraindicati-  
 ones considerabit, virtutem, complexionem, figu-  
 ram corporis, ætatem, consuetudinem, artem, ac-  
 cidentia, tempus anni, regionem, constitutionem  
 æris; quæ regulæ & tanquam tyranni, iubent &  
 cogunt nos, quod non deberemus facere. Si ita-  
 que in his optimè exercitatus futurus Medicus  
 meus fuerit, erit proculdubio optimus & ratio-  
 nalis Me-

21. Aph: 21.

nalis Medicus; & quantò indicationes curandi magis distinctas habebit, tantò tutius operari poterit: si verò confusas indicationes habebit, certum est quòd aberrabit, ac indistinctè & confusè operabitur. Vnde verus Medicus dicitur esse ille, (vt inquit Gal:) qui magis distinctè discurrere nouit à particularibus ad vniuersalia, & ab vniuersalibus ad particularia, vsq; ad indiuiduum; quod si & nos faciemus, tunc perfecti boniq; Medici ac verè Philosophi erimus. Sed vtinam priùs aliqui nostrum artem & habitum bonum hunc addiscerent, quàm exequerentur; sicut enim (vt aiunt) vnusquisq; id agit feliciter quod optimè nouit: ita qui principia & officia Medici non ignorat, cuius finis sanitas existit, vt sanum ægrum reddat necesse est. Egregiè ludit ille in Medicos, cùm inquit: Vidi ego plurimos heri Aromatarios, hodie Medicos: heri barbarum rasores, hodie morborum grauium censors: heri herbas cæteraq; materialia in Apothecis commiscientes, hodie in principum aulis morbos iudicantes. Si enim etiam sanando, vix nomen boni Medici quisq; assumit, quonam pacto necando medicandi titulum vendicabit? Mira certè res est. Vt enim, inquit Hieronymus: Fullones, metallarii, fabri, lignorum rasores, ipsa quoq; vilia officia exercentes, absq; doctore esse non possunt, nec experiri audent, quod non nouerunt: sola est medicandi ars, quam sibi passim vnusquisq; vendicat. Alii enim à crebrò infirmantibus Medicinam addiscunt, alii à foeminis vt viros cui èr,

Gal: 2. de  
Crisibus.

1. ad Glauconem. & in  
lib. Terapen

In Speculo  
viii.



alii ab infidelibus Hebræis medicantur & audiunt, ut fideles necent: alii nescio quibus libellis legunt, ut in miseris corporibus vniformiter exequantur: & (vt aiunt) vno colyrio ab eis incognito, omnium oculos volunt curare: quo fit, ut cæcus arte, natura videntem cæcum faciat: alii Medicinam nescientes, medicina abutuntur, & artem egregiam, quam non nouerunt, profitentur, Medicinæ excellenti & illustri nomine gloriantur: quippe quæstus gratia, pecuniam vt finem quærunt: præmium certè vero Medico, non modo exiguum, sed sordidum & tanto labori impar, nec ingenio dignum. Ex quibus huius artis difficultates & incōmoda in promptu sunt, dum viris excellentibus non creditur, & hac laudatissima arte abutentibus, præmia dantur. Adde quia multa millia hominum, talium Medicorum insipientia aut inexperientia, fortè moriuntur, & dum vnum morbum curare satagunt, plures inducunt, asuescuntq; miseros ægros, vt sine medicinis vivere non valeant, quas nisi aliis parandis, minimè ipsi tangunt, nec degustant. Taceo quot morborum prolongationes, quot pestíferas potiones, quot infirmitatum comminationes, miseris infirmis ingerunt: & quos abstinentia, aut simplici victu, vel herba, si scirent, curare poterant; sumptuosis vltra marinis quippe & adulterinis materialibus, quæ ipsi aut vendunt, aut illorum lucrum participant, curare: potiusq; inficere humana corpora moliuntur. Edisserunt quidam causas & naturas ægritudinum subtiliter,

liter, dantq; sanitatem verbo tenus: adeò vt sicut quidam sapiens dicebat: Cùm eos audimus, mortuos posse suscitare credimus: paulò tamen post cernimus inanem esse eandem sanitatis spem, quam ilicò insperata mors intercipit. Tales vulgares Medici, omnes infirmos esse præter se & suos, insalubremq; & pestiferam àëris constitutionem desiderant. quos quidam sapiens similes dicit iis, qui ad funera corpora hominum sepelienda deferunt. quos Demosthenes Athenis damnauit exilio, eo solo, quia optabant plurimos mori, vt inde lucrum caperent, quod contingere non potest sine multorum morte. Tales etiam fortassè Medicos toties à Romanis exploratos legimus: eo quòd præter superuacaneam impensam, accedebat iactura populi; idq; fuisse verum ex loco Galeni coniicitur; cùm ille in vno Mense quatuor aut sex magno labore seruabat ægros, ceteri autem viginti singulis diebus occiderent. fuisseq; tempus Romæ, quando sexcentis annis illis carere maluerunt; nec spontè postea admiserunt, nisi quando veneficia & adulteria aliaq; mala irruerunt. Et si quando apud nos ista licentia medicandi quibusuis erat licita, & nullis legibus còercita; nunc nescio quorum culpa & negligentia reuiuiscit. ita vt omnes meritò suggilent & clament: latrones, sicarii, venefici, homines inhumaniter occidunt: Medici tamen humanissimè & officiosissimè solèniterq; interimunt. Meum autem Medicum hunc, quem leui brachio adumbraui, (eundem ad Hippocratis Me-

*In arte curat.*  
*rat.*



157  
Hipp: teste  
in Prognost.

Cardanus in  
lib: de malo  
medendi vsu.

dicatrinam, siue librum de Medici officio, qui omnium suorum voluminum principium est, & ad Galeni Medicum, qui idem Physicus est, relegans) spero si bono illi habitui assequendo plurimum insudauerit, bonum deinde usum atq; exercitium accuratum & perfectum adiunxerit, siq; pectus omni disciplinarum genere expleuerit, plurimosq; morituros à morte si eripuerit & liberarit, (fieri enim non potest vt omnes agros sanos faciat) quod eum homines vt diuinum habebunt, amabunt & venerabuntur, non calumniabuntur, neque in secundis reponent. Modò etiam velim, vt finem faciam, ne homines in Medico eligendo fallantur, ne velloquacior, aut ambitiosior, aut senior, aut qui plures clientelas numerat, aut promptior, aut magis precipitem, aut magis familiarem, aut moribus còptior, aut verbis blandior, aut vestibus ornatiorem, vel eum qui potentum limina terit, reliquis præferant: cum studium assiduum, doctrinam copiosam, diligentiam exactam, naturæ iudicium acre, vera prognostica, & optimos successus debent antepone.

FINIS.

*Cum Licentia Superiorum.*

m-  
Ga-  
pe-  
da-  
ra-  
di-  
tu-  
on  
no-  
pū-  
no-  
no-  
ci-  
lu-  
gis  
cō-  
na-  
uis  
pi-  
-



